

第一名

郭功臣

Liar

得獎感言

承蒙教育部、承蒙評審，分LGBTQ摻代理孕母等議題有隻討論个機會，現下婚姻平權雖然合法，毋過仰般解決性別个歧視摻偏見還有當長个路愛行。

感謝臺灣師大地理系、客家社學習養成，分佢對這遍土地有還較多个了解。也感謝中央大學客語二專班、清華大學閩南二專班个訓練，一字一句用自家个母語摻日常記錄下來。

最尾感謝第94R逐位同學，在佢分打落時，一路个扶持、相搨正有這作品个出現。



阿姆一聲一聲个「俵仔」

在英文裡肚其實係「落仔」

俵仔个「身分」係騙、「認同」係騙

在身分、認同落下來時，可能斯長著「家」係正經个

〈伴〉

時間差毋多咧，又係姊妹仔打鬥四个時節。冬時个日頭透過窗門照落來，晒到人身體燒灼燒灼，毋過仰般都晒毋燒該冷颼颼个心。Starbucks服務人員大聲喊等四杯latté好咧。阿將膠咖啡送上桌，一陣陣咖啡香，柔柔仔散開來，啲一口該苦蒂苦蒂个咖啡，大家心肝肚都有講毋出个艱苦，毋知愛仰結煞。

「最近佢學校開校事會議開到拚拚滾，舞著歸學校鬚鬚絞絞，大家都毋知愛仰結煞。」阿將目扁扁仔个講。

講著學校个厝糴事，你一句、佢一句，大家都慍悴起來，毋過「法」就恁樣定乜無奈何。平常嬌妮妮个高妹，毋知仰仔今晡日嘎心事重重，阿將講个佢一句都無應，連脣頭行來行去个後生條仔，乜入毋去佢个眼，毋知在該想麼个？突然間高妹開嘴認真个講：「今晡日佢有事情愛同你兜參詳？」

大家看等高妹係有麼个大事？仰恁正經。

「佢想愛降子。」高妹嚴肅个講。

大家全恬下來，像聽毋著麼个樣。郭妹、羅妹、阿將發痴驚个相互看一下。

「等……等一下，你講你愛降子，你有同若老个講㗎？」郭妹著驚問。

「㗎。佢想先問你兜个意見。」高妹回覆時，聲調淡薄，就像變一隻人共樣。

一溜里來高妹就係大家感情个先生。讀研究所時，郭妹分男朋友騙錢、阿將摻學長離緣，高妹都會勸話大家。連露水姻緣來時，佢乜會時時提點毋好昏船，日頭出來就愛醒。無想著感情看恁淡个佢，接等講：「人生行到這，做得試个、做个，差毋多都體驗過了，這下佢斯想愛有一隻自家个家，有一個自家个細人仔。」高妹目汁含等，有種祈求做得做哀个目神。

郭妹敢一口大氣講：「這下在臺灣毋合法，你想愛去哪位做？聽講該愛開當大條錢。」

高妹應該收集已多資料，對這事情乜有一定了解，佢打開手機仔摻相關資料傳分大家講：「佢有查過咧，去美國降愛差毋多六百萬臺幣，另外細人仔還會有美國籍，以後假使愛移民，做得利用細人仔个身分去美國。」

大家一片滑等手機仔，佢一片講：「毋過佢正買屋，無恁多錢。聽講東南亞乜有，毋過網路頂尋毋著，可能係前一駁仔有澳洲人去泰國降子，無想著一降出來，細人仔有問題，該兜外國人直接無愛，飛轉澳洲，舞到這下東南亞大抵禁止，愛有門路正做得。這下在東南亞都係毋合法个，驚怕到時會有問題。」

「佢乜有在面書頂看著『兩個爸爸』个廣告，一看就知係為佢兜這族群服務个，毋過因為在中國，網路也尋毋著其他消息，佢驚分騙。這下佢斯

尋著這間公司，佢在俄羅斯。」高妹就像寫論文樣，逐隻門路都分析到清清楚楚。

「該在俄羅斯做愛幾多錢？」阿將輕聲問。

「差毋多美國一半定定。」高妹輕鬆應。

郭妹驚怕佢會分騙，黏時講：「你愛再想看看無？你去俄羅斯做，雖然斯美國个一半，毋過還係大嫲條錢。再講這斯包降無包畜，你還愛愁慮佢寒抑燒、飽抑枵，畜細人仔又還愛再開一大條錢，該你幾時正做得退休？這下學生仔又恁毋好教，該你退休金又愛仰結煞？愛喊政府畜，係斯毋敢想。」

郭妹乜開始正經講出自家个想法，敵一口大氣，接等又講：「這下做人爺哀無恁該。佢兜這代可能還會想著自家爺哀，毋過現下逐隻細人仔，爺哀惜到命根團樣，等佢兜大咧，無伸手摻爺哀拿錢，就愛偷笑了。愛喊佢兜顧自家爺哀該斯難。」

停一下，郭妹續等講：「教育環境改變，寫作業就像求佢阿公樣，講佢幾句就滿哪仔投，這下逐隻細人仔都已重視自家个權利，佢兜麼个形投，你在學校乜知。」

「這佢都有想過啊，毋過佢這下就係希望有一隻自家个細人仔。佢想體驗做哀仔个感覺，佢無恁多錢，降一個就盡罉咈咧，人生有體驗著就好。等佢老咧，佢乜無一定愛佢服侍佢。再講，假使佢這下想做時毋做，佢想佢以後乜毋會做了。」高妹打從心肝肚講。

郭妹緊拂頭，阿將提出自家个看法：「既然打算愛降，該有想過尋一對乜想愛有細人仔个Lala¹搵手無？假使尋得著，無一定你兜做得摻佢兜結婚，

兩戶人家戴兩對門，毋單淨對屋下有交代，世大人來看，就做一下戲，大家也毋食虧，在學校教書乜毋會有人在你背後燒話。」

阿將續等講：「以前公視个節目紹介一對Lala醫生仰般降子个過程，感覺細妹人較有畜子个心性。去做一隻子愛開恁大條錢，將就摺錢分正式个親哀仔較實在。假使尋毋著，該你有想過尋越南嫲無？這下莊下當多尋毋著舖娘个老貨仔都尋外籍个較多，乜毋使恁多錢，舖娘還做得分你擇，若爺衰老咧，佢還做得照顧一屋大細。」

看來高妹都有想過，佢聽煞黏時回：「佢前駁仔有去Ptt²尋著幾對Lala，毋過佢兜開出个條件無像佢兜想个恁簡單。對佢兩儕普通个公務人員來講，薪水正式無辦法負擔。佢愛佢兜買兩對門个屋，還愛負擔大大細細錢銀，該佢直接去做一隻較贏。佢係細俵身、細妹心，毋過有兜T³斯係細俵心，性當惡。」

停一下後，高妹笑等講：「討隻越南嫲？該佢毋知在屋下愛仰般摺佢相合？你兜正係同性戀，佢毋係。討隻越南嫲在屋下，佢又毋係女同性戀，再講屋下佢正係頭家娘，該佢係梅香仔？還係？恁樣昶複雜，到時驚怕會當麻煩。」

郭妹還係愁慮高妹會分人騙，挑挑問：「妹婿這下還毋知，假使佢講，你去降子，偲俚就離緣。該你愛仰結煞？你兜都行十過年咧，你敢盼得？」。

無想著高妹應：「毋盼得乜愛盼得，佢係希望佢做得同佢共下照顧細人仔，毋過假使佢無辦法，佢乜毋會強逼佢，因為這係佢自家選个，佢也毋使

為著佢犧牲麼个。假使佢愛離緣，該就係佢兜个時間到咧，人生行到最尾乜係一儕人，該也無奈何。」

大家都恬下來，停無幾久，高妹無奈無何續等講：「假使佢正式離開佢，佢一定會傷心流目汁一段時間，毋過佢還係會帶等細人行下去。」

一下仔大家乜毋知愛仰般講下去，這時羅妹問著：「該仰毋去領一個細人仔就好？看親戚朋友還係社會團體都做得問問看啊，假使係愛體驗做哀仔，這乜係一種方式。」

無想著這部分佢乜有按算過，高妹已認真个講：「愛領養細人仔無恁簡單，愛行个手續一千擔。再講這下佢老个又無想愛結婚，佢屋下乜毋知佢个事，愛用單身个身分去領細人仔根本無可能。佢正想直接去做一隻細人仔較遽，從細渡到大也較有感情。領養無一定做得領著嬰兒仔，假使領著一門高大个細人仔，佢可能都有自家个想法咧，愛佢認同佢係厥姆無恁簡單。」

大家全都恬下來，毋知愛仰般接下去，這時高妹疑狐問大家：「你兜試著佢愛降俵仔，還係妹仔較好？」

「假使做得選，降俵仔較好啊。你愛想假使降妹仔，你一儕人愛仰般渡？細妹人月事來咧愛仰般教？一個爸爸渡一個妹仔，學校先生會仰想？到時通知社工來訪問，該斯盡麻煩。」阿將已像有經驗个應。

續等阿將又講：「對若爺哀來講，應該乜希望係俵仔啊，佢兜該代還係有重男輕女个觀念，等老咧還係希望有俵仔來兜香爐鉢。」

郭妹聽煞乜黏時頷頭，看來還係試著降俾仔較實在。

這時羅妹就像鬼精仔樣插嘴問：「人講好種毋傳，壞種毋斷，假使降著像你共樣腳佬長个『高腳妹』該斯仰結煞？」

高妹「啊」一聲，手揸等目珠假噉講：「你毋好咒佢，你毋好咒佢，這絕對毋會發生，這生人佢尋伴尋到當辛苦。」手放在桌頂後，又開容笑面講：「該佢會同佢講，做高腳妹當辛苦，毋好像阿姆佬樣，愛好好成人長大。」大家聽著都哈哈大笑。

郭妹認真个問：「假使細人仔正式摺佢兜共樣該仰結煞？佢兜一溜里來都無佬該。」

高妹收起笑容回：「該乜係佢選个，無一定佢生成就佬樣，該就係佢人生个課題。佢斯畜佢大，無畜佢老。佢愛學會面對，就像佢兜，爺衰乜無教佢愛仰般面對別人个歧視、燒話，佢兜還係一步一步行到這下。假使細人仔愛摺佢講，佢會同佢共下面對，假使佢毋講，該佢就愛自家學習面對人生。人生个路一溜里來都礫礫砵砵，哪有佬好都無風無雨个。」

大家都恬下來咧，看來高妹打定主意，這時阿將問：「該你打算幾時愛去做？暑假？還係寒假？」

高妹就像計畫好咧，回著：「佢打算今年七月初過去，加加減減應該明年暑假就做得接細人仔轉來。該公司係講假使愛擇性別愛加錢，愛擇卵又愛加幾多錢，擇孕母另愛加幾多錢，愛个服務越多，就愛越多錢。講到這你兜順續摺佢共下看，愛擇哪隻細妹仔个卵較好？該公司分佢當多細妹仔个相片做紹介，搨看哪隻會較適當？」

看等逐張相片，大家開始嘅嘅嘅討論哪個細妹仔个卵較適合。高妹就像愛做哀仔樣，細心細義个掬算盤，想像愛迎接仰般个細人仔來到屋下，未來又愛仰般渡子？其他人斯希望高妹毋係堵著落仔在該撮把戲。

〈叛〉

冬時个日頭較懶尸，臨暗五點零就落山咧，這時高妹差毋多乜到屋下。Rex因為在臺北上班，下班後還愛等車、坐車、盤車，逐日準準八點左右正會轉到中壢，假使加班，該正式會無閒到三更半夜正做得轉屋。屋下斯廳下有點火，坐在膨凳頂个高妹看等筆電螢幕一頁接等一頁个紹介，一張張孕母摺嬰兒仔个相片。笑弛弛个嬰兒仔，就像一隻隻圓滿个家庭，一種生命傳承、延續个感覺衝上心頭。

「阿姆夯佢時，佢在該想麼个？」高妹心肝肚緊愜。

「該佢係希望佢係俵仔抑妹仔？」高妹想等以前姊妹仔打鬥四个話。

「假使做得選擇，阿姆係毋係愛俵仔？該佢係毋係一開始就希望這世就係妹仔？」

「一定係註生娘無弄好，這下嘎半離半棧。還係……床公婆一擺分佢兜兩儕都做得滿足這世个希望？該佢這下愛降子，乜係一擺做到歸屋人个望想了。」

高妹想起想轉，想起細細時節看等阿姆夯妹妹，阿爸問佢：「希望係弟弟還係妹妹？」佢大聲喊「妹妹」，阿爸黏時笑咪咪仔連講：「好，湊雙變『好』，屋下會越來越『好』。」毋過佢無講个係「恁樣就有姊妹仔伴咧」。

從細爺哀對佢兩儕教育方式就無共樣，雖然講妹妹係滿女，毋過爺哀要求屋下大細項事都愛學兜仔，出去行寮乜有時間限制。高妹係長子又係長

孫，生來人高馬大，爺哀對佢个限制嘅無像妹妹恁多。讀高中時逐日補習班下課，佢都會到新公園迂一輪正坐尾枋車轉。三更半夜轉屋下，爺哀乜無聲無氣，最多斯提點下擺早兜轉來。毋過看妹妹從細就分要求愛學做屋下大細項事，佢多多少少乜會搵做。無想著遊遊野野自由慣个高妹，這下嘅希望「洗淨鉛華，宜室宜家」。在外商公司食頭路个老妹嘅變到自由自在、雲游四海，滿哪仔開會、行寮，斯年節正會轉屋。

目珠皮越來越重，高妹在膨凳頂恬恬睡落去，目陰目陽時，耳空脣傳來一陣一陣學校鐘聲，佢企在臺上準備上課，好點點仔一隻細人仔走落來，喊等「阿爸、阿爸」，學生仔看著全在該笑，高妹追出去想愛攆細人仔擒起來，細人仔緊行緊笑，高妹跣等佢後背，毋過仰般都追毋著。最尾細人仔行到一個婦人家脣頭，婦人家牽起該細人仔个手。高妹想看清楚佢兜个面容，毋過斯看著婦人家肚屎頂有一條紅線，細人仔肚臍乜有一條線，兩條線像光連等佢个手，高妹兩手一捉，手嘅分Rex鎖匙劃著，高妹「啊」一聲跣起來。

「愛死咧係無？」高妹面逼逼念等。

「佢轉來時，看你恁好睡，就無喊你。」Rex笑笑講。

「下擺佢應該愛攆你翕起來。頭先你睡到手開開、嘴擘擘，就像阿丑樣，實在笑科。」Rex笑等高妹，順續攆煮好个卵湯兜上桌。一片兜湯，一片講：「無人像你恁好命，盲嫁人就睡到天烏地暗，嫁人還仰結煞？」

高妹搵等目珠，擘嘴問：「這下幾多點咧？」

Rex回佢：「八點零，好得有先打電話訂便當，今晡日佢去拿時，還有人愛包便當，早就賣淨淨咧。」

高妹看等又係便當，心肝肚就感慨「假使多一隻俅仔、妹仔，該就毋使逐暗晡食便當了。」故一口大氣惱等「兩人愛仰般煮？煮多又食毋忒，煮少又愛仰買菜？假使有三儕該就有盡多變化，佢做得煮佢兜想食个，逐日都有變化，日仔正有味緒。」

高妹飯扒無幾口就無食咧，惱心事个面容，Rex都看現現。食飽夜兩人坐在膨凳頂，Rex提著：「還係佢調到中壠來，佢樣就毋使逐日花佢多時間通車，偲佢乜有較多時間。」

高妹疑狐看等Rex問：「在臺北市好好，仰愛調？轉到中壠來又愛從菜鳥仔做起，佢樣敢有較好？」其實高妹一點都毋想Rex調轉來，因為佢樣變到逐日都像分人監視樣。共下十過年咧，又毋像正認識該下，逐日都愛黏在共下，這下兩人有兜空間對高妹來講可能係較好个相處方式。

Rex麼个話都無應，毋過佢做得確定个係「高妹毋係為著無時間陪佢正心愁」。

「Rex，佢愛攞你參詳一件事。」高妹睡目前開聲問厥老个。

「仰？」Rex問。

「佢想愛一個俅仔。」高妹細聲講。

「吓？你講麼？你想愛一個俅仔？」Rex聲變大重問一聲，原旦想睡个，這下精神全都來咧。

高妹看等Rex个面，該面毋像以前熟事个Rex，間肚開个暖氣嗰像關忒樣變到清冷。

「係啊！佢想愛一個俅仔。」高妹一隻字一隻字唸清楚。

「你在該開玩笑係無？來，喊『爸爸』，今暗晡你做俵仔。」Rex雙手掙等高妹到佢胸脯前。

「佢無開玩笑，佢愛去俄羅斯尋代理孕母降一個俵仔。」高妹推開Rex个手，面對面正經个講。

間肚个光恬恬照下來，Rex面壀青，嘴就像分番薯塞著樣，一時毋知愛講麼个。高妹看著佢个面煞煞講：「佢希望偲俚做得共下渡這細人仔，就像一般人个家庭共樣。」

Rex聽真高妹个意思後，啟一口大氣，聲變到較大講：「畜細人仔毋像畜狗仔、貓仔樣，該係一生人个事。畜狗仔、貓仔假使合毋來，還做得讓手分人，細人仔一降出來你就愛負責佢歸生人，你有想清楚無？」

「這佢都知啊，錢个事你乜毋使煩勞，佢都打算好咧。假使佢兜有細人仔，以後就正式係一隻家咧。你同佢共下渡好無？」高妹細心細意輕聲拜託个問。

Rex心肝肚火屎燦天，毋過還係忍等講：「你有想過細人仔有兩個爸爸這對細人仔公平無？臺灣个社會環境這下還言做得接受偲俚，你看以前多元成家公投時，幾多人打毋同意。這下你在學校愛結婚，該兜同事會在你後背講麼个夭壽話？你自家知。細人仔成人長大假使無細義講出佢有兩個阿爸，同學、其他家長會仰般想？在學校上課，假使先生無辦法接受，該細人仔又愛仰結煞？分人誚難、啷洗一生人，佢佇得著？」

Rex聲骸變大，嚴肅个講：「大官食細官，細官食百姓，百姓這下食麼个？為著你想愛有一隻細人仔，開始食肚皮、食子宮？用別人个肚皮來降細

人仔，佢樣敢適當？別人會全心全意摻你夯人？佢試著佢樣忒扒灰了。再講等細人仔大咧，問你阿姆在哪？你愛仰應？講你正係阿姆？還係……」看等高妹額結結仔，Rex無再講下去，斯丟一句：「細人仔做得接受自家係做出來个無？你斯想看啊。」

空氣就像寒流來到樣，毋單淨凍著人身，乜凍等人心。高妹千算萬算，無算著Rex會起戇面，高妹悠悠仔應：「佢兜生著佢樣，佢兜个爺哀有分佢兜選係無？再講人生有好分佢兜選係無？假使有好選，佢乜希望做得過正常人个日仔，毋使偷偷囡囡摻自家个心思囡起來。從細到大就像帶等面殼過日仔樣，講出來驚爺哀煩勞，驚人見笑。這下佢斯希望有一隻自家个細人仔，佢乜希望做得過一般人个生活，體驗做人爺哀个感受，一把屎一把尿摻佢畜大。這下別人愛仰般想佢無辦法，佢斯想做一個平常人，享受普通家庭个生活。」

高妹嘆一口氣續等講：「買賣算分，佢付錢摻一隻自家个細人仔轉來，該一銖⁴一角乜係佢自家賺食來个，該婦人家用自家肚皮來賺食乜係佢選个，佢也無強逼佢。」

高妹講煞後，兩儕都恬啊下來，Rex又敢一口大氣講：「人生个路，一儕行袒孤栖，兩人行正有味。因為有你，本來佢想，佢兜就佢樣一路行下去，毋管屋下人仰謫難，外背人仰燒話，就做佢兜想做个。毋過今晡日佢試著佢分人反叛咧，佢愛降一個自家个細人仔，該佢咧？假使最尾會行到這，早知佢就儘採尋一隻細妹伴結婚就好，降一個抑兩個，屋下人歡歡喜喜，乜毋使分人指指點點該有个、無个。」

Rex聲放較軟下來，用拜託个聲講：「假使你有傳香火个壓力，佢也有啊，一溜里來佢兜都係同心，這屋就係佢兩儕个天地，毋管該兜傳統个責

任，佢兜就恁樣過下去好無？假使想愛結婚，等佢個爺哀都老咧，再辦乜無爭啊，佢兜這下戴共下，摺結婚有麼個爭差？」

聽Rex講愛同細妹仔結婚，高妹臊火當著大聲應：「假使你有傳香火個壓力，想尋細妹仔結婚，該你隨時都做得去啊，佢乜毋會攔等你，恁樣就毋使愁有人會噏洗你咧。係講你乜想愛有一隻自家個細人仔，你乜做得去做一隻啊，佢會同你共下照顧。毋係有血緣個正係屋下人。」高妹麗⁵下去，被骨蓋等打側睡咧。

Rex麼個乜無講，看等眠床頂睡等個人，今夜前原旦還係該熟絡個伴，毋過為著細人仔嘎變成生份人咧，就像分茫神牽著樣，仰講都毋會分醒。Rex定定麗下來，驚怕吵醒高妹，打側睡，看著高妹個背囊骨，一節接等一節，就像上一代接等下一代樣。「毋係有血緣個正係屋下人」這句話纏等Rex心肝肚，間肚斯長時鐘滴滴落落個聲。

月光漸漸沉落去，日光在窗門箭落來，等高妹䟽床，Rex已經去上班了。對教書個人來講，學校個生活逐日就係上課、下課，毋過今晡日個高妹上逐堂課，佢都會想著昨暗晡，夢肚課堂行落來個細人仔。高妹一片上課一片恁等，假使有一隻自家個細人仔，佢會生著仰般？佢個聲又係仰仔？看等臺下一個個學生，另擺佢個細人仔乜會像佢兜共樣，坐在臺下聽先生上課。高妹就恁樣迷迷痴痴到下班，轉到暗冬冬個屋下時，無想著Rex既經摺佢個東西全搬走咧，斯長鎖匙放在廳下个桌頂，就像星仔樣瞞等微微個光，風摺門關密，斯像高妹聽著自家個心，「砰」一聲，這下正式變成一儕人，「恬」漸漸散開來。

〈辦〉

就在Rex搬出去後，高妹不時會夢著自家行到一條河壩脣，該水烏疏疏，看毋著底，水面頂浮等一張張个紙，紙項有字，毋過濛濛，仰般都看毋清。乜算毋清幾多隻暗晡，半夜著下醒，摸著个毋再係Rex溫燒个膻身，斯長著冷減減个枕頭。

為著有一隻自家个「家」，高妹越來越煞猛參加代理孕母社團个活動，裡肚个人員，毋係五十大零歲以上事業成功个大哥，就係二、三十歲分屋下逼等去做个後生條仔。後生條仔大抵有屋下相搵，毋管係做嬰兒仔愛个錢銀，還係細人仔个照顧，阿公、阿婆都會顧到好勢好勢。對這兜後生條仔來講，搵嬰兒仔出來逛街，代表一種好額个身分地位，尤其在這人人毋敢降个時代。

毋過對五十歲以上个大哥來講，又係另外一種光景。對佢兜來講，在事業有成後，總試著人生欠兜麼个。到這歲數正降，就像伯公渡孫樣，細人仔愛麼个，伯公都會變出來，項項事務都讓等細人仔。這兜細人仔有時正式做得講係「散財童子」正得。

裡背个成員大抵都去美國做个較多，像高妹恁樣白手捉魚，又想愛細人仔个，歲數大體都三十大零到四十零歲，做一隻細人仔就盡罇咁。高妹也想過，假使轉屋下講清楚，無一定爺哀會相搵兜，自家乜毋使恁辛苦。毋過爺哀會仰般看佢个身份？佢行出簞筲時，係毋係爺哀就入去簞筲咧？假使無弄好，驚怕會落棺……高妹毋敢再想下去，這時上飛行機个廣播聲響起，高妹帶等愁慮登機，開始佢萬里尋子个路程。

飛行機个冷氣吹到高妹歸身起雞嫲皮，拿起毯仔蓋到歸身塞塞，就像雞嫲孵卵樣。窗門外層層疊疊个雲，高妹緊想：「該旨出世个細人會生著仰般？頭那毛、目珠會有麼个色目？佢哪部分會像佢？」

熱天下晝个哈爾濱無像臺北恁翕熱，日頭雖然大，毋過照著人還係有一種清冷个感覺，高妹乜毋知到底係自家心愁，還係這片天時本來就恁樣？隨手買張中國移動个SIM卡，接下來攞等包袱請師傅載佢到火車站，暗夜八點準備愛坐隔夜火車到黑河。日頭驚怕高妹無坐著，等佢上車後正漸漸落山。火車裡背已多細人仔走來走去，就像搞園人尋樣，隨等火車緊行緊遽，細人仔个聲緊來緊細，夜色就像墨樣恁濃，窗門外斯看得著一點一點个燈火。高妹憑等壁，看等對面上下床个歸家人，原旦爬上跌落个細人仔，這下恬恬在下床，睡在厥姆心肝前。阿爸睡在上床，一陣一陣牽覺聲就像行軍時个喊聲，保護歸隻家。一陣心酸个感覺衝上來，為著該毋知會成，抑毋成个細人仔，為著有一隻自家个家，佢放下Rex，瞞等屋下、學校，偷偷囡囡行上這條萬里尋子个路。假使這擺毋成仰結煞？再講夯人、降子个過程，有小可無注意都可能造成細人仔無辦法順利來到這隻世界，愁慮就像喊頭大水，打在高妹心頭頂，痛到講毋出話來。

東片山邊脣，天頂漸漸出現魚肚白，四點零天甫甫仔光，高妹歸夜睡毋落覺來到中國北片黑河這隻邊境都市，頭暈腦疼个佢在車頭啣杯咖啡，希望等下毋會暈船。按算成半年个計畫，就係為著今晡日，日光射到江水項顯出一陣一陣金光，就像一條烏龍鑲等一片片金色魚鱗樣，高妹心肝肚緊想「毋求龍、毋求鳳，斯求佢係砸磗个弟牯」。護照頂黏等光華華个俄羅斯簽證，辦入境時高妹个手緊掣，佢乜毋知到底係緊張，還係歡喜？地圖項該細細一粒像米穀共樣大个邊境都市——「海蘭泡」，一隻生命就愛生根發芽。

代辦單位請出中文个通譯，通譯个聲、聽毋識个話，揚著空氣肚，高

妹簽等一份又一份个文件，一隻隻簽名毋係為著婚姻、領養，係愛摻自家个種，放到一隻佢盡心擇个卵裡背，再種到一個名安到羅伊莎个婦人家身頂。羅伊莎頭那定定擎起來，目神恬靜，高妹乜望等佢，兩儕隔等一張桌仔，這下，佢兩儕命運開始連結，一隻分社會拒絕个生命等等⁶羅伊莎創造。

代辦單位个通譯指等文件裡背細人仔个性別欄位，「Gender Preference」該空白个欄位，就像一口深井，摻佢拉到老屋个公廳，世大人長透講个：「……香火愛傳，公廳正光……」這話就像放人个符水，一代咁過一代。有火正會光；有光正有家；有家正有香，為著「傳香火」這三隻字，最尾佢還係摻欄位裡背个「M」箍起來，這一箍毋單淨點著公廳个香火，也撐起佢該望想个家。這時高妹想起厥姆，係毋係夯佢時乜為著這三隻字愁勞博激。

攞歸日个程序，總算結束咧，臨暗日頭佷燙西山直直毋肯下去，滿天紅霞照在黑龍江面久久毋會散，高妹原路轉去，睡在火車个眠床頂，想起頭擺孟姜女萬里尋夫，最尾長城都分佢噉橫忒，這下佢係萬里尋子，希望註生娘庇佑，做得分佢一個白淨康健个俵仔。這條路毋單淨圓等一隻家，乜係為著圓滿一隻家族个責任。睡到目陰目陽時，佢目絲絲看著窗門外一條染到紅紅个河壩，跔等火車彎彎幹幹流往下，一陣唧唧啐啐講話聲毋知在該講麼个，佢恬恬認真个聽，聽著一個婦人家帶等怨恨喊等：「都係你害个。」一聲接過一聲。高妹大聲噉等：「毋係、毋係。」聲大到佢摻自家乜嚇醒。日頭掛在東片，哈爾濱到咧。

轉臺灣後，高妹續等開始淦淦个暑假輔導課，拜六、禮拜假使有大型考試，佢乜報名做監考人員，為著迎接俵仔來到，盡命牯樣多賺一兜乳粉錢。拿卵、擇卵、受精卵、植入、著床，代辦單位通知一行行个文字，一張張个

相片，就像廟肚个符樣，有一種心安心定个感覺。暑假就愛結束，再過成半个月就三隻月咧，孕母肚屎會漸漸穩定，明年五、六月俵仔就做得順利出世。高妹心想：「俵仔，希望你好好成人，佢會渡你長大。」

毋過明年五、六月愛仰般去接俵仔又係問題，學期中愛請三日出國無恁該，就在高妹心愁時，一封電子郵件寄來，裡背寫等「因為染色體毋正常，孕母落胎，其他个受精卵毋係毋健康，就係無適合个性別。」高妹目汁濫汨，想著以前全部个按算又愛重頭來過，「愛再做一擺無？」、「假使又失敗仰結煞？」這兜話纏等高妹。人生行到這，又伸著佢一儕，既然選擇咧，該就再過行下去。暑假最尾隻禮拜，高妹又一擺開始佢萬里尋子个旅行。

通譯个聲，一聲一句，就像敲等公廳个門。高妹擎等筆，毋過手緊掣，一紙又一紙，一筆一劃寫落去，就像寫等俵仔个命卦、佢个家，乜係屋下个香火，手酸、心也酸。風柔柔吹來，高妹看等異鄉个水，頂高个光，一瞞一瞞。

〈盼〉

又到年尾咧，再過幾隻禮拜，這學期就愛結束。高妹打開電視，分屋下加兜人聲，就毋會恁孤栖。一片備課，一片等孕母、通譯上線，想。了解這駁仔情形。這時Line个通知聲傳來，高妹看一下訊息，係Rex傳來个。

Rex：恁久好無？

高妹：和和仔，你咧？

Rex：佢這下戴在板橋，去臺北市上班已方便

高妹：仰毋戴在臺北市，恁樣毋係還較方便？

Rex：因為恁樣你去上班乜方便

高妹：？？

Rex：你學校毋係在桃園高鐵呀？

高妹：係啊！

Rex：這行到板橋高鐵站毋斯五分鐘，你坐車到桃園十過分就到咧。

高妹：續下來？

Rex：你再行去學校，毋使十分鐘。

高妹：意思？

Rex：你愛摻佢共下戴無？這屋佢自家買个。

高妹目汁一點一點跌下來，想起這一年來一儕人春上跌落，心肝肚總少一兜麼个，該時Rex無聲無氣就搬出去，高妹有點毋甘願，還有點悶。這段時間身項來來去去个人，就像露水，天一光就走到無影無蹤。兩儕共下久咧，其實也習慣了。逐擺想著Rex，拿起手機仔，想打，又毋敢；想講，乜毋敢。手機仔光光，佢還係無打，面乜拉毋下來。這時Line个通知聲又響起……

Rex：屋毋大，細細間，毋過罇偲兩儕共下戴。假使有細人仔，還有一間分佢。

高妹：卵還孵等，愛熱天正會出來

Rex：有你恁Hot⁷？無？你斯辣瓜仔⁸。

高妹：哈～

Rex：俀仔、妹仔？

高妹：揣看啊……

Rex：時代在該進步，應該係俀(line)仔。

高妹：慶～

Rex：該佢做得喊你「爸比」⁹，喊佢「Daddy」。

高妹：該佢係最靚个「爸比」，哈～

Rex：在屋下無？

高妹：係啊。

Rex：佢在你樓下了。

高妹「啊」一聲，目汁就像水龍頭打開樣，流毋會停，該係一種等待、盼望、希望……高妹著等大襖，緊觸觸仔行到樓下个便利商店，佢知Rex一定在這。以前兩儕冤家，Rex都會下來淋杯涼个正上去。高妹頭勾勾仔望等便利商店，無想著Rex雙手在佢後背伸出來搨佢，高妹著下驚，毋過該熟絡个手又轉來了。

高妹渡Rex轉屋，在電梯肚Rex講：「原旦佢驚。驚分人發現佢兜个身分、驚分屋下人傷心流目汁，驚怕跌忒佢个家、佢个頭路、佢个全部。」高妹恬恬个聽。

轉屋下後，兩儕坐在膨椅頂，Rex悠悠个講：「佢想已久咧，偲佢辛苦恁久，毋就係為著一隻『家』？」Rex單腳腳膝蓋頭跪下來，拿出一隻禁指。

高妹歸身緊掣；目汁緊跌，慢慢仔伸出厥左手个蛇頭指……

高妹同Rex講和个時節，電視新聞堵好講SARS再過來到？中國武漢不明原因肺炎流行，人還人个速度已遽，中國政府這下密切關注。

年三十高妹轉老屋食團圓飯，屋下世大人唸等結婚、降子，高妹嘎心愁中國武漢封城个消息。看等電視頂武漢家家戶戶全分關在屋下，這下佢斯希望中國政府做得控制人瘟毋會散開來。毋過緊恹心嘎緊毋安，中國毋比臺灣，想起舊年佢兩擺萬里尋子个過程，行過中國大大細細个城市、人民百

姓个樣相、新聞媒體个限制……高妹心想：「羅伊莎戴在該天西佬遠个海蘭泡，應該毋會分影響正著。再講中國佬大，會還佬遠？該係俄羅斯啊。」

就在高妹心較平靜時，又想著「前駁仔臺灣毋係有第一隻在中國著病轉來个……」高妹愁勞博激个留下訊息，希望做得了解羅伊莎該片情形。該夜高妹反躁到翻起翻轉，越想越愁，「假使人瘟還開來，臺灣封起來仰結煞？暑假愛行第三擺个計畫係毋係愛調整？」代辦單位裡背个通譯大抵都過年去咧，愛年過忒正會回覆。新正年頭留分高妹个毋係歡喜个團圓，斯有愁慮摻分離。

俄羅斯个冬時，人員大抵都在屋下，完全無辦法出去。年過忒看著羅伊莎夯等佬仔平安个影像，高妹个心乜較平靜下來。毋過開春以後，人瘟就像綻筍樣，世界各國連等發現病例。高妹又開始煩勞起來：「假使代孕中心有人員分還著該愛仰結煞？」原旦年過忒愛搬去板橋个計畫，這下全停下來。高妹準備摻羅伊莎接來臺灣。

2020年1月20日俄羅斯摻通往中國个邊境口岸全部封忒，雖然二月立春時，代辦單位人員仰解釋，乜無辦法解決高妹心肚个愁慮。接孕母出國，還愛配一個通譯，錢銀个部分全部都愛高妹負擔，毋過這下佬仔做得平安順序出世比麼个都重要。人治个俄羅斯，平民百姓愛出國無佬簡單，等兩儕文件齊全，這時既經三月初咧，人瘟就像野火，燒到滿哪仔都係，世界各國航班減少，飛行機毋係延期，就係停飛，等到三月中機票確定買好，羅伊莎正肚挺挺坐上飛行機，經過南韓首爾，再到臺灣。3月19日開始，臺灣禁止所有外國人員入來臺灣。

羅伊莎夯等七個月个身項同通譯戴在高妹桃園个屋，兩禮拜个隔離，高妹逐日打早上班前先到桃園顧羅伊莎，下班再看佢兜有麼个需求，再過轉去

板橋。Rex變成高妹最好个後斗，高妹想起去年看著羅伊莎个檢驗報告，都希望驗出來个係雙雙對對，該雙線就像佢摺俖仔。這下逐日个檢驗，佢嘅希望做得係單條就好，這單就像屋下三代單丁，阿爸、高妹摺該準備出世个俖仔。佢乜無想著，舊年險險愛放忒个俖仔，這下再過幾隻月就愛出來見面，佢个家總算愛圓滿咧。

隔離期結束，高妹轉桃園戴，服侍起羅伊莎摺通譯，借這機會乜順續了解俖仔出世後，佢愛仰般照顧。厥俖仔係羅伊莎最尾胎，降忒這胎羅伊莎無辦法再降，一方面歲數大咧，另外佢自家乜有細人愛渡，這擺出門恁久，乜會想自家个細人。疫情期間，大家出門都會心愁，驚怕接觸著染病个人，到時又愛分關歸禮拜。毋過對羅伊莎來講，可能佢兜个冬時天寒地凍，根本無辦法出門，對這下做毋得出門嘅慣慣，平常時除忒逐隻月高妹會固定渡佢去醫院檢查，逐日一大早佢還會到公園行行仔，吸兜自由个氣息。

六月底羅伊莎羊水破忒，俖仔平安出世，醫院黏時做親子鑑定確定係高妹个細人後，續等就愛辦理收養程序。高妹隔等玻璃窗門，看等嬰兒間裡背護理人員摺細人仔放在該細細个眠床項，脣頭寫等佢个名，目汁強強就會跌下來。高妹在心肝肚同俖仔講：「承蒙你來做佢个俖仔，分佢一隻圓滿个家，無論另擺你會變成仰般，這世你做好佢个俖仔就好，毋使像佢恁辛苦變成『Liar』。」看等俖仔个嘴一開一合，高妹唸起頭擺阿姆教佢个「嘴嘟嘟，食豆腐；嘴扁扁，食牛眼……」

對羅伊莎來講，因為佢兜國家無做月个習慣，出院該日乜係佢愛轉去俄羅斯个日子，佢在臺灣个影跡，斯長高妹俖仔身分證明頂母親欄位該幾隻字。毋過羅伊莎斯孕母定定，正式个阿姆「不詳」。

暑假又來到，高妹除照顧自家俅仔以外，還按算一件重要个事，這愛尋厥老妹——阿芳搵手。

七月个風吹來燒灼燒灼，阿芳駛車載等厥姆去高妹屋下食晝。

「阿姆，哥哥有好消息愛通知你」阿芳開容笑面講。

「仰仔？」阿姆心肝掣一下，心想準無好事，尋佢毋尋爺。

「等到哥哥屋下，你就知咧。」阿芳笑咪咪仔，該嘴角笑到愛彎到目眉毛樣。

「若哥哥愛結婚係無？」厥姆開始心愁起來，頭擺佢兩姊妹恁樣講時，就係愛滅事情咧。

疫情影響，高速公路車仔較少，官當晝就到桃園咧。高妹笑弛弛仔到一樓迎接佢兜。厥姆還係摸毋著頭錫，心肝肚哼哼跳無停。電梯坐到12樓，高妹打開屋下門，恬靜靜麼个都無發生，這屋毋係就摻以前共樣，厥姆心嚟較平靜下來，有點發悶念等：「愛死了係啊！兩儕手長腳長咧，還在該嚇人。」

高妹摻間房門打開來，這時厥姆看著細人仔險險會昏忒，阿芳黏時行過去扶等厥姆，分佢坐在膨凳頂。高妹搨出細人仔緊到厥姆脣頭講：「喊阿婆，喊阿婆。」

厥姆目汁含等，手軟腳犁麗在膨凳頂，嘴緊念：「佢就知準無好事，準無好事……」殮殮仔又問：「你兜兩隻壞東西，你兜係毋係愛佢同若爸講？」

高妹摻阿芳目珠盯大嫫粒，緊領頭。

厥姆想著自家愛做阿婆咧，手正伸出去，高妹煞煞摻胸脯前个細人仔分阿婆捕。阿婆惜孫一點都毋會差，厥姆緊念：「尤牯、尤牯……」，順續問一句：「俵仔抑妹仔？」

阿芳笑等回：「金孫啦！」

厥姆笑到嘴都合毋起來，緊捕緊看，笑等講：「這細人仔就像印出來个，摻你哥哥細時共樣共樣。」厥姆想一下，黏時問：「該阿姆咧？」

高妹就像做毋著事情个學生仔樣，一隻字一隻字慢慢講出來：「這……係俵去俄羅斯做出來个，俵……係同性戀，有一隻伴這下共下戴在板橋。」

厥姆聽著險險會勳忒，闕到目汁落落跌，又毋敢忒大聲，驚怕吵醒金孫，佢細聲講：「妖精！以前問你係毋係同性戀，你還講毋係，害俵逐擺轉去拜阿公婆都毋知愛仰般應人。這下走恁遽，俵愛仰般講？」

阿芳煞煞拿衛生紙分厥姆掙目汁，厥姆目汁掙燥後，敢一口大氣講：「俵轉去會摻若爸講，你降子咧，毋過長个你愛自家講，係無驚怕若爸又會罵俵。」

這可能乜係高妹有按算著个，高妹回：「再過成禮拜細人仔就愛滿月咧，到時俵請你兜共下來食滿月酒。」

講到這，厥姆遽遽應：「該一定愛个，另外你還愛渡細人仔轉老屋拜阿公婆，分阿公婆知屋下有添丁咧。」

突然間金孫噉一聲，阿婆黏時企起來緊搖，「尤牯」聲一聲接一聲。

惜花連盆，惜子連孫。高妹厥姆轉屋下後，前前後後交代到清清楚楚，厥爸斯講一句：「知咧，幾時愛食酒？」對老古板个厥爸來講，可能金孫比麼个都較重要。

滿月酒該日阿芳載等阿爸、阿姆共下去高妹屋下食酒，高妹厥爸看著金孫嘴都合毋起來。飯桌頂高妹驚怕開學以後，細人仔無人顧，希望爺衰退休下來做得搵手，高妹開嘴問：「等開學後，佢朝晨都愛上班，做得請阿公、阿婆搵顧你兜个金孫無？」

無想著高妹厥爸開嘴嘎講：「做得啊，毋過你幾時愛結婚？」

高妹笑弛弛仔，無講話，這下佢毋係「Liar」，佢有一隻正經个家。心肝肚个香火，定定仔燒，煙也有光。

該光，照等頭過，乜照以後，照等世代代無盡个家。

註解

- 1.Lala：女同性戀。
- 2.Ptt：BBS站觀看訊息。
- 3.T：女同性戀中，較為陽剛的角色。英語為Tom Boy。
- 4.銑：音sien'；錢幣的單位，借自日語「錢」的發音。cent（一分錢）的音譯。
- 5.𪗇：音te；「躺」的意思。
- 6.等等：音den˘ nen'；等著。
- 7.Hot：英語，有熱、燒、辣个意思。
- 8.辣瓜仔：華語「辣妹」个意思。
- 9.爸比：音同英語Barbie，芭比娃娃。